



Broj: 03/1-50-14-7-30-5/16

Sarajevo, 26.10.2016.

PREDMET: Informacija o radnoj posjeti Regionalnom uredu Granične policije BiH - SJEVEROZAPAD, Gradiška, 20.9.2016.

Sifet Podžić, predsjedavajući Zajedničke komisije za odbranu i sigurnost BiH, Ljiljana Milićević, sekretarka, i Željko Grubešić, stručni savjetnik, bili su 20.9.2016. u radnoj posjeti sjedištu Regionalnog ureda Granične policije BiH Sjeverozapad u Gradišci te tom prilikom razgovarali s načelnikom Regionalnog ureda Nijazom Softićem i njegovim saradnicima.

U Regionalnom uredu Sjeverozapad članove Zajedničke komisije o radu Granične policije BiH u njihovoj zoni odgovornosti informirali su načelnik Softić i pomoćnik direktora GPBiH Slobodan Krstić.

Tokom razgovora o stanju u terenskom uredu GPBiH - Sjeverozapad članovi Zajedničke komisije informirani su da TK Sjeverozapad pokriva 310 kilometara državne granice Bosne i Hercegovine. Šest međunarodnih i tri lokalna granična prijelaza pokrivaju tri jedinice GP sa sjedištem u Gradišci, Dobrljinu i Velikoj Kladuši.

U razgovoru o stanju na granicama BiH, kao i u Regionalnom uredu GPBiH Sjeverozapad konstatirano je da se zadaci izvršavaju krajnjim naporima s obzirom na nedostatak ljudstva. TKGPBiH Sjeverozapad popunjena je sa 76% od planiranog ljudstva, i to predstavlja veliki problem, kao i neadekvatna infrastruktura na pojedinim graničnim prijelazima.

Tokom prvog polugodišta 2016. godine nadležnim tužilaštvima u BiH je iz TK Sjeverozapad dostavljeno 15 službenih izvještaja zbog postojanja osnova sumnje da je na graničnim prijelazima i u graničnom pojasu počinjeno 15 krivičnih djela za koja je prijavljeno 15 lica. Neovlašten promet akcizne robe i posjedovanje opojnih droga te krijumčarenje i trgovina ljudima glavni su problemi, koji su evidentirani u 2016. godini na graničnim prijelazima koji su u nadležnosti TK Sjeverozapad.

Načelnik TKGP Sjeverozapad Nijaz Softić i njegovi saradnici su tokom razgovora o stanju u njihovoj zoni odgovornosti istakli da je nedovoljna popunjenost ljudstvom sve izraženiji problem i rukovodstvo Granične policije BiH čini velike napore u popunjavanju novim kadrovima i školovanju novih kadrova. U ovoj godini evidentirane su velike gužve i čekanje građana na pojedinim graničnim prijelazima za vrijeme turističke sezone.

Jedan od uzroka dužeg čekanja na granici je i već spomenuti nedostatak ljudstva u GPBiH, loša infrastruktura kao i činjenica da je Republika Hrvatska članica Evropske unije, što nalaže i dodatno poštivanje mjera sigurnosti na granici.

Načelnik Softić i njegovi saradnici informirali su članove Zajedničke komisije o rezultatima rada s pripadnicima GP Republike Hrvatske, što je dalo dobre rezultate i u svakom slučaju doprinijelo jačanju povjerenja u regionalnu prekograničnu saradnju.

Čelni ljudi Granične policije BiH i Regionalnog ureda Sjeverozapad nedvosmisleno su opredijeljeni za jačanje odgovornosti u izvršavanju svakodnevnih zadataka, za nastavak popune graničnim policajcima u kontinuitetu, za nastavak procesa modernizacije i odgovora na izazove koje pred sobom stavlja njihova zahtjevna misija.

Članovi Zajedničke komisije posjetili su i granični prijelaz Gradiška, gdje su razgovarali s graničnim policajcima, čelnim ljudima jedinice Granične policije Gradiška i Mirom Džakulom, direktorom UIOBiH. Uvjerili su se u veoma teške uslove za rad i krajnje dotrajalu infrastrukturu.

Zaključak:

1. Razgovori s rukovodstvom Granične policije BiH i Regionalnog ureda Sjeverozapad GPBiH dali su potpunu sliku o stanju na granici Bosne i Hercegovine.
2. Problemi odliva stručnih ljudi i niske plaće su sve izraženiji jer granični policajci ističu da su pripadnici kantonalnih i entitetskih MUP-ova daleko bolje plaćeni. Udaljenost mjesta službovanja od mjesta stanovanja je veoma izražen problem i dodatno opterećuje radni angažman pripadnika GPBiH kako u ovom dijelu BiH tako i u cjelini.
3. Problem popune nedostajućim kadrom, posebno graničnim policajcima, mora se rješavati i treba uložiti dodatne napore da se u Agenciju za školovanje i stručno usavršavanje kadrova Ministarstva sigurnosti BiH šalju redovno i planski kadeti koji će se osposobljavati za poslove i zadatke koje obavlja Granična policija BiH.
4. Zabrinjava stanje infrastrukture na graničnim prijelazima koji su frekventni (primjer GP Gradiška). Bez njih je nezamisliva dnevna prekogranična saradnja sa zemljama u susjedstvu i okruženju. Primjer loše i neuslovne infrastrukture je GP Gradiška.
5. Predsjedavajući Podžić je u vezi sa stanjem na graničnim prijelazima održao i sastanak s Mirom Džakulom, direktorom Uprave za indirektno oporezivanje BiH, koja upravlja infrastrukturom na graničnim prijelazima, te s rukovodstvom RKGPH Sjeverozapad na graničnom prijelazu Gradiška s ciljem sagledavanja stanja i preduzimanjem adekvatnih mjera za popravljavanje stanja infrastrukture na graničnim prijelazima u cjelini.
6. Članovi Zajedničke komisije konstatirali su da granični policajci trebaju imati adekvatne uslove za rad i to treba biti jedan od prioriteta u daljnjem jačanju integritetnog upravljanja bh. granicama.

PREDSJEDAVAJUĆI KOMISIJE
Sifet Podžić

Dostavljeno:

- naslovu
- a/a